

NDOVU NA SUNGURA



Kimotho G. Gabriel

Kimechapishwa na:
Starlink Translation Centre
P.O. Box 241-00600 Nairobi

© Kimotho G. Gabriel, 2017

Haki zote zimehifadhiwa. Hairuhusiwi kuiga, kunakili,
kupiga chapa, kutafsiri au kukitoa kitabu hiki, kwa jinsi
yoyote ile, bila idhini, kwa maandishi, ya Kimotho G.
Gabriel.

Chapa ya kwanza 2017

ISBN 978-9966-1979-9-3

Michoro imechorwa na Abraham Ngume
Kurasa zimeruwazwa na Puritan Designs

Hapo zamani za kale paliishi Ndovu mmoja mkubwa kama mlima Kenya. Aliishi kwenye msitu mmoja mkubwa wenye majani mengi ya kupendeza. Ndovu huyo alikuwa mwenye bidii na alililima shamba lake vizuri sana.



Mimea yake ilinawili kuliko hata ya Simba. Alikuwa mfano mzuri wa kupigiwa wanyama wengine. Alipenda kazi kama uji wa mtama. Wanyama wote walifurahia sana kila wakati walipokaribishwa mlo na Ndovu huyu kwani walikula si haba.

Ndovu huyu alikuwa mshauri mkuu wa Simba, na ingawa Simba alikuwa mfalme, alimheshimu yule Ndovu na hakumkatalia kwa chochote. Aliufuata ushauri wake na walipatana si haba. Wanyama wengi walidhani kwamba yule ndovu angempindua Simba lakini hawakuufahamu urafiki wao. Kwa kweli Ndovu yule alimheshimu Simba si haba na alikuwa amejitolea kufa na kupona



kuona kwamba utawala wa Simba
uliendelea bila mgogolo wowote.

Ilikuwa siku moja aduhuri ambapo
wanyama wote walikuwa wamekutana
kwa mkutano mkuu wa mwaka. Simba

alipokuwa akiongea, mnyama mmoja alicheka ghafla. Simba alikasirika mno. Alitaka mnyama aliyecheka kujitokeza la sivyo angewaadhibu wote. Ilitokea kwamba hamna mnyama ambaye alijitokeza. Simba alikasirika mno. Ndipo Ndovu alipomwendea na kumwarifu kuwa Ngiri ndiye alikuwa amecheka. Alipoulizwa Ngiri, alisema kwamba makosa yalikuwa ya Fisi kwani ndiye alikuwa amemwambia kwamba alikuwa na njaa sana. Mara hiyo hiyo Ndovu alimshika Fisi kwa mkonga wake.

Alimzungusha juu ya kichwa chake mpaka Fisi akaona vimulimuli. Ghafla bin vu, alimwachilia. Fisi alipita hewani kama umeme. Alilia kwa sauti kubwa



iliyowafanya wanyama wote hata Simba kucheka. Walimsikia akianguka mbali kwa kishindo. Mkutano uliisha vizuri.

Usiku mmoja Ndovu alikuwa akitoka kumsindikiza Simba. Alisikia sauti fulani kwenye shamba lake. Alienda kuchunguza. Alipokaribia hakuona chochote. Aliuinua mkonga wake juu lakini hakupata ile sauti tena. Alipokuwa anarejea nyumbani alidungwa mguu. Hakuelewa ni kitu gani kilicho mdunga.



Asubuhi ilipofika, mguu wa ndovu ulikuwa umefura mno. Ndovu alikuwa na uchungu mwingi. Alimwita sungura aje aweze kumwangalia.

Sungura alifika unyo unyo akiwa na furaha kuu kwa kuitwa na Ndovu. Alipomwona Ndovu tu furaha yake yote iliyeyuka kama umande wa asubuhi. Mguu wake wa kulia ulikuwa umefura sana. Ndovu hakuweza kuamka wala kutembea. Alikuwa na uchungu ambao haungepimika. Kwa hakika sungura aliweza kuona kwa mbali machozi yakimlengalenga Ndovu.

Sungura alichukua sindano kubwa kutoka kwa mkoba wake. Alitoa kijembe ambacho kilitoshana na sikio lake na kuanza kumtibu Ndovu. Mara



alipougusa mwiba, Ndovu alitoa sauti mkali iliyowaleta majirani wake pale. Wote hawakuwahi kumwona Ndovu katika hali hii. Waliogopa. Wengine

hata walitokwa na machozi wazi wazi. Usaha mwingi uliweza kutoka wakati Sungura alipokuwa akienga enga ili autoe mwiba. Baada ya dakika kama thelathini hivi, Sungura alifaulu. Aliutoa mwiba mdogo sana. Mara hiyo hiyo, alimpa ndovu majani ya mti fulani na alipoyameza tu, uchungu ukamwisha. Aliweza kusimama bila shida yoyote. Wanyama wote walirukaruka kwa furaha.

Ndovu alimuuliza Sungura kilichompa uchungu ule wote. Sungura akamwonyesha kipande kidogo cha mwiba alichokitoa. Ndovu alikiangalia kwa makini na kutingisha kichwa chake kikubwa. “La, haiwezekani. Kiumbe mkubwa hivi kama mimi, siwezi



kuumizwa na mwiba mdogo hivi. Mimi nina nguvu zangu. Haiwezekani”.

Sungura alimwangalia Ndovu na kumwambia kwa upole, “Bwana wangu, huu mwiba unayo sumu kali, ungekaa

mguuni mwako kwa siku mbili zaidi, basi huo mguu wako ungekatwa”.

“Wewe Sungura ni mnyama mdogo sana. Sikiliza kwa makini. Mimi sikubali kamwe kuwa kidude kama hicho kinaweza kunipa uchungu wa aina hiyo. Hebu kirudishe mahali ulipokitoa.



Nguvu zangu zinakishinda. Mimi si Sungura wa kushtuliwa na vitu vidogo vidogo hivi.” Akasema Ndovu.

Sungura alikataa kata kata kuurudisha ule mwiba. Alimwomba Ndovu amwite mfalme Simba ili awasaidie kutatua tata ile. Swara alimwendea Simba na kufumba na kufumbua, Simba alikuwa amefika pale. Alipoyasikiliza yaliyojiri pale, Simba alimwambia ndovu aache upuzi kwa kuwa mbio za manyonda huishia nyangwani.

Ndovu naye alimkaidi Simba. Alimwita Sungura na kumpa kile kipande cha mwiba. “Mimi ni mnyama mkubwa sana. Mkubwa kuliko wengine wote. Siwezi kuwezwa na kitu kidogo kama hiki. Kwa hivyo ili wengine

wajue nguvu zangu si za kukopa,
nakulazimisha uurudishe huo mwiba
mahali ulipoutoa na uugongee ndani
kwa nyundo hii mara moja.”

Wanyama wote hadi Simba
walishangaa. Hawakumwelewa Ndovu.



Sungura alifanya kama alivyoagizwa na mkubwa wake. Wanyama waliondoka mmoja mmoja. Baada ya masaa mawili hivi, walisikia sauti kubwa sana ya Ndovu. Sauti iliyowagutusha wote wakubwa kwa wadogo. Wote walifika kwa Ndovu. Kwa mshangao mkubwa,



Ndovu alikuwa amelala pale. Alikuwa amekufa fofofo.

Simba aliagiza shimo kubwa sana lichimbwe ili Ndovu aweze kuzikwa kwa heshima kubwa. Simba aliwajulisha wanyama kwamba kifo cha Ndovu kimeacha pengo kubwa sana kama Ndovu ambalo halingeweza kuzibwa na yeyote. Sherehe za mazishi zilihudhuliwa na wanyama wote. Wanyama wote isipokuwa Simba walilia sana. Wote walimpenda Ndovu si haba. Walimzika na kurudi makwao. Simba kama mfalme wao na zaidi kwa kuwa rafiki mkubwa wa Ndovu, aliyachukua mashamba yake yote. Hamna yeyote aliyeuliza swali.

Walipofumukana, Fisi walirudi makwao. Waliketi pamoja. Fisi yule

mkubwa aliwahutubia. Aliwaambia kwamba kifo cha Ndovu ni harusi kwao. “Sasa hamna haja ya kutafuta chakula kwa mwezi mmoja. Lakini lazima tujihadhari, Ndovu tutamla usiku wakati wanyama wote wamelala ili tusije tukaonekana.” Fisi wote walikubaliana



kwa pamoja lakini mmoja wao
akawaambia kuwa yeye hawezi kula
maiti ya rafiki yake.

Usiku huo Fisi wote walitoka kimya
kimya nakwenda hadi alipozikwa
Ndovu. Walifukua na kuanza kumla.
Asubuhi yake, Nyani ndiye alikuwa



wa kwanza kuwapata. Fisi wale wote walikuwa wamekufa pale pale karibu na kaburi la Ndovu. Yule mmoja aliyebaki nyumbani alihuzunika mno kwa kufiwa na jamii yake yote.

Kwa mara ingine wanyama wote walikusanyika kwa mazishi ya Fisi kumi na wanne. Simba alipokuwa anawaeleza kiini cha kifo cha Fisi wale, alishtumu sana ulafi baina ya wanyama. Aliwaambia kwamba kifo cha Fisi kilikuwa ni malipo ya kutenda mambaya kwa wengine. Aliwachekesha wanyama alipowaambia kwamba kifo cha Fisi hakikuacha pengo lolote. Alimwagiza Sungura kuleta moto na akaagiza kwamba Fisi wale wachomwe kabisa, ili liwe funzo kwa wanyama wengine.

Maswali

1. Ndovu mkubwa aliishi wapi?
2. Ndovu alikuwa mshauri wa nani?
3. Mnyama yupi alicheka katika mkutano?
4. Kwa nini mguu wa Ndovu ulifura?
5. Ni nini ilimaliza uchungu wa ndovu?
6. Mbio za manyonda huishia wapi?
7. Kamilisha: Ndovu alikufa.....
8. Kwa nini Fisi walikufa?

9. Kifo cha Fisi kiliacha pengo gani?

10. Fisi walizikwa wapi?